

5.4 juta layak terima bantuan SARA bermula bulan depan

Kuala Lumpur: Seramai 5.4 juta penerima Sumbangan Asas Rahmah (SARA) layak menerima bantuan itu secara keseluruhannya sehingga RM2,100 sepanjang tahun ini, bermula 1 April nanti.

Perdana Menteri, Datuk Seri Anwar Ibrahim, berkata Kerajaan MADANI meluaskan pelaksanaan SARA membabitkan peningkatan hampir lapan kali ganda berbanding 700,000 penerima sedia ada.

“Penerima yang layak akan menerima bantuan SARA se-

hingga RM2,100 secara keseluruhan pada tahun ini, berbanding RM1,200 pada 2024.

“Ia membabitkan peningkatan 75 peratus daripada tahun lalu. Bantuan ini akan dikreditkan secara bulanan ke MyKad penerima di seluruh negara, termasuk Sabah, Sarawak dan Wilayah Persekutuan Labuan,” katanya menerusi kenyataan, semalam.

Anwar yang juga Menteri Kewangan berkata, peluasan bantuan itu adalah sebahagian daripada peningkatan peruntukan

program Sumbangan Tunai Rahmah (STR) dan SARA kepada RM13 bilion pada tahun ini.

Beliau berkata, ia sekali gus mencatatkan jumlah tertinggi dalam sejarah penyaluran bantuan tunai kerajaan kepada rakyat.

“SARA adalah pendekatan bantuan secara bersasar di mana sebahagian pertambahan hasil negara serta penjimatan daripada perbelanjaan subsidi digihkan semula bagi membantu mereka yang benar-benar memerlukan.

“Penyaluran SARA melalui

MyKad juga bersasar kerana kaedah itu memastikan golongan sasar menerima manfaatnya dalam bentuk barangan asas,” katanya.

Beliau berkata, 5.4 juta penerima terdiri daripada 700,000 penerima SARA sedia ada di dalam rekod eKasih yang menerima bantuan itu sejak Januari lalu.

Katanya, mulai 1 April ini, mereka akan menerima bantuan tambahan SARA sebanyak RM50 sebulan untuk golongan warga emas tiada pasangan dan RM100 sebulan untuk isi rumah.

“Penerima juga terdiri daripada 4.7 juta penerima STR sedia ada yang tidak berada di dalam rekod eKasih. Mulai 1 April ini, mereka akan menerima bantuan baharu SARA sebanyak RM50 sebulan untuk golongan warga emas tiada pasangan dan RM100 sebulan untuk isi rumah.

“Mulai tahun ini, penyaluran SARA melalui penggunaan MyKad akan diperluas ke negeri Sabah, Sarawak dan Wilayah Persekutuan Labuan berbanding hanya di negeri Semenanjung pada tahun lalu,” katanya.